

山川記第四

光緒昌平州志卷五

城東二里曰亢山一名亢家山

畿輔唐志一名亢家山州東二里

又四里曰影山

畿輔唐志遠望之其影先見 昌平舊志影山在州

城東六里爲東山口障護

又一里曰平臺山

昌平山水記東山口內一里水中有小山曰平臺山
成祖嘗駐蹕焉

又南八里曰九里山一名縣山又名宜山

舊志九里山在城東十里一名縣山又名宜山 按李因篤芹城小志縣山在州東十五里或名宜山元混一方輿勝覽載有縣山寺

又南五里曰孟祖山

采訪冊在城東十二里

又三里曰白石山

舊志白石山在城東十五里山石潔白故名

又七里曰大湯山又二里曰小湯山

舊志大湯山在城東二十五里又東二里曰小湯山
有溫泉 按一統志云東三十里湯山今據舊志

又北十六里曰大駝寨山

畿輔唐志州東四十五里山崖陡峻而頂平漫少東
有石洞十數洞內有泉 舊志大駝寨山在城東桃
林麻峪之北

又三十五里曰史山

舊志史山在城東七十里

城西八里曰雪山

按舊聞攷引畿輔山川志雪山在州西八里畿輔唐志云九里

又三十二里曰柏谷

按舊志云柏谷在城西白羊城南又云白羊城在城西四十里

曰羊兒陀

舊志羊兒陀在城西北四十里白羊口內

又十里曰尖山

舊志尖山在城西五十里白羊口內

曰馬鞍山曰茱萸陀曰搶風崖

舊志俱在白羊口內

又四十五里曰雞冠崖

舊志雞冠崖在白羊口迤西四十五里僻處萬山峰
巒險峻內有磧洞

又十五里曰鶴頂山俗呼鍋頂山

采訪冊鶴頂山在城西六十里禾子澗俗名鍋頂山

按畿輔唐志云州西三十里非也

又十里曰牛心山

舊志牛心山在城西七十里與上常谷口近

又十餘里曰長城嶺

薊邱集北山上平衍西五里有嶺曰長城微有古堞
剝蝕傳是秦皇之址有泉出焉曰馬跑又西二里有
了思臺下臺而西又十里皆峻嶺也灰嶺險倍於長
城石如蛤粉下山有城是鎮邊之廢邑又西八里有
城是曰鎮邊 舊志長城嶺在城西禾子澗馬跑泉
池東 按馬跑泉村在城西八十里然長城嶺西互
十餘里故城西九十里之村以橫嶺名也鎮邊城在

山下亦在城西九十里

曰灰嶺

詳上注

城北三里曰城後山

采訪冊城後山距城三里

又一里曰蘇嶺

畿輔唐志州北四里

又一里曰蔣山

采訪冊蔣山在城北五里上有仙人洞

又七里曰饅頭山

舊志饅頭山在城北十二里

又八里曰晏磨峪

采訪冊在城北二十里

又四里曰玉華山

舊志玉華山在城北二十四里

又八里曰金櫃山

畿輔唐志昌平州北居庸關城西形如金櫃

城東南五里曰龍泉山舊名白浮山

舊志龍泉山卽白浮山在城東南五里上有都龍王祠山半一洞有人梯石而下初狹漸廣行里許水聲砰礫不敢前洞北麓有潭潭西北泉出亂石間按一統志云白浮山在州東南十里上有二龍潭

城西南四里曰鳳凰山

按舊志鳳凰山在城西南四里明一統志云筆架山南曰鳳凰山出城西四里至紅門兩山並峙連翩如鳳翥

又二十一里曰神山一名神嶺峰亦名駐蹕山

昌平山水記在州西二十五里其山長而北袤凡二十里石皆壁立高可十丈其頂皆白山之南有棲雲嘯臺高二丈許正北有石梯可上金章宗建亭於此舊傳山下有石牀石斧今亡 天府廣記山高十餘丈西北袤二十里金章宗游此鑄駐蹕字上有臺章宗自題棲雲嘯臺四字

又二十里曰虎兒陀曰九女陀曰仙人陀

舊志虎兒陀在駐蹕山西又西南有九女仙人二陀

按駐蹕山西袤二十里三陀在其西

又十里曰牛山

舊志牛山在城西五十里山下有泉相傳有神牛降
自山飲泉而竭故名

曰畫眉山

舊志畫眉山在城西南五十里泰州務北 按宋彥
山行雜記云金山口度嶺至冷泉村道旁行二里曰
泰州務其後畫眉山帝京景物略云畫眉山在西堂
村北產石黑色畿輔唐志畫眉山在宛平西北二十
里諸說互有異同今攷泰州務在昌平州城西南五

十里與宛平縣治北二十三里界相近唐云宛平非也

又四十里曰六華巖曰小神山曰青利山又南十里曰長峪又西五里曰德勝巖亦曰鳳凰巖曰孤松巖山南曰西峪少北曰白鶴峰

薊邱集鎮邊城西十里有堠曰唐耳背據大山斜界居庸鎮邊廢邑其南皆山中爲衢路東曰六華之巖西曰小神之山曰青利之山巖分形如六華其第四巖有洞深窈是爲鳴皋洞南十里有聚曰長峪又西

五里有崖曰德勝又曰鳳凰上有蘭若山下出泉流
二十里達於渾河山上有隱鷲臺山西有觀音洞又
曰孤松崖山南嶺曰西峪其下有碑不可辨識自長
峪而東二十里有聚曰菩提塹有寺曰白瀑寺出山
而北曰白鶴峰又折而東則走高崖

曰碧駕巖曰通明山曰鷹揚山曰涔落山

薊邱集鎮邊兩旁皆山南曰碧駕曰通明北曰鷹揚曰
涔落碧駕之巖有小湖

城西北六里曰小金山

舊志山在城西北六里西山口內日午人過山下光
影入衣如金色然

曰錦屏山亦名鹿馬山

舊志錦屏山又名鹿馬山在西山口內

曰銀泉山亦名銀錢山

舊志銀泉山又名銀錢山在大紅門內迤西

又四里曰虎谷山又五里曰大虎谷山

長安客話駐蹕山西曰虎谷其旁土岡名小金山

昌平山水記西山口西四里有虎谷山又五里爲大

虎谷山 舊志虎谷山在城西北十八里內有握雲洞 按顧說大虎谷山在城北十五里舊說十八里蓋據山之西北言

又三里曰大谷山

舊志大谷山在城西北十五里 按明昭陵在此畿輔輿圖云大峪山州西北十八里非也

日照壁山

畿輔唐志州西北十五里 方輿紀要照壁山方如屏障

曰積粟山

舊志積粟山在城西北十五里相傳元時積粟於此
下有唐朱懷珪墓 按方輿紀要積粟山在州西二
十里與軍都山相屬然今當從舊志

曰玉帶山

舊志玉帶山在城西北十五里山腰有白石若帶

又北曰長水峪

采訪冊在城西北十六里

又北曰天壽山初名黃土山